

Ha'u-nia respeitus ba:

- Prezidente AJTL, Zevonia Viera
- Prezidente Konsellu Imprensa, Virgilio da Silva Guterres
- Sekretáriu Jerál AJTL, Alberico da Costa Junior
- Estimadus journalists no estudante sira iha workshop ne'e

Bondia maluk sira hotu no obrigada organiza ona semináriu importante ida-ne'e, kona-ba haforte mídia dijital atu luta kontra dezinformasaun iha Timor-Leste.

Ha'u kongratula estudantes nain 15 ne'ebé hola parte iha workshop ida-ne'e. Aleinde ne'e, ha'u agradese ba servisu Alberico da Costa Junior ho ninia ekipa hodi organiza formasaun ida-ne'e.

Embaixada Estados Unidos sente orgulhu apoia dezvoltamentu Timor-Leste nia jornalista sira ho fó apoiu ba workshop kona-ba importánsia profesionalizmu no ezatidaun iha jornalismo no mídia. Maibe importante mós kona-ba liberdade espresaun iha sociedade livre no ezatidaun iha reportajen.

Iha Timor-Leste no Estados Unidos no sociedades democráticas hotu-hotu, jornalista sira dezempeña papel ida ne'ebé importante tebes.

Jornalismo di'ak fó informasaun ne'ebé ema presiza hodi halo desizaun koretu no halo líder sira toma responsabilidade – katak jornalista sira bele serbisu ho efetivu liután ba justisa no direitos humanos, no nune'e sira-nia governu bele representa sira ho di'ak liután.

Tanba ne'e jornalismo livre, independente nu'udar pilar ida demokrasia nian, no razaun Estados Unidos ho orgulhu apoia jornalista sira iha mundu tomak.

Iha Timor-Leste ne'e, ita haree ona respeito klean ba jornalista sira hotu ne'ebé konta ita-boot sira-nia história no alerta mundu kona-ba Timor-Leste nia korajen no sofrimentu durante tempu Rezisténsia.

Embaixada Estados Unidos esforsa makaas hodi onra no lao-tuir jornalista sira ne'e nia kompromisu ba nasaun ida-ne'e. Iha espírito ne'e maka ami apoia jornalismo iha Timor-Leste liuhusi programa formasaun oin-oin kona-ba jornalismo hanesan ohin ho ida-ne'e.

Ami orgullu fornese orsamentu ba Asosiasaun Jornalizmu Timor-Leste hodi apoia programa ne'e. Ida-ne'e parte husi Estados Unidos nia esforsu hodi kontra dezinformasaun no apoia jornalizmu investigativu bazeia ba faktu iha mundu tomak.

Tinan oin, ami sei kontinua knaar importante ne'e liuhusi kooperasaun ho AJTL hodi kria Literasia Mídia "Tech Camp" ne'ebé sei lori especialista internasionál sira mai Timor-Leste hodi serbisu ho jornalista lokál sira atu kria solusaun ba problema espalla informasaun falsu online.

Membru sira balun husi AJTL no Konsellu Imprensa hola-parte ona iha ami-nia programa interkámbiu no ha'u kontente tebes haree kooperasaun ne'e kontinua ba oin.

Ami mós apoia dezvoltamentu abilidade Inglés Jornalizmu liuhusi bolsa-estudu nu'udar omenajen ba Marie Colvin, jornalista Amerikana ida ne'ebé uluk mantein hela iha Timor-Leste iha tinan 1999 durante tempu ida perigozu tebes no konsege fó sai mensajen ba iha comunidade internasionál.

Jornalizmu no ita-nia ambiente informasaun iha ona mudansa makaas kompara ho uluk Marie Colvin iha Timor-Leste. Mídia dijital no sosiál nu'udar ferramentus di'ak tebes hodi fahe informasaun ho livre. Maibé ita haree ona oinsá informasaun laloos, agora ne'e bele espalla ho lalais deit no kria konflitu iha ita-nia comunidade-sira.

Kapasidade hodi buka no hatoo reportajen jornalizmu konfiável no bazeia ba faktu ne'e importante tebes. Ita presiza jornalista forte sira ne'ebé bele hatoo informasaun loos ba públiku no kestoens investigativu hirak ne'ebé importante ba públiku Timoroan nian.

Ha'u enkoraja ita-boot sira hotu serbisu didi'ak hodi buka lialoos liuhusi halo análise kuidadoza no reportajen investigativu. Demokrasia ida ne'ebé funciona ho di'ak depende ba ita-boot sira-nia servisu no programa formasaun sira hanesan ne'e.

Obrigada!